

առնի, դուք կըօնով զատուած մեր եղբայրներն էք, առատ-առատ կցանէք, կհնձէք ձեր հացահատիկները. ձեր սրտից բղխած հնչին մի մասը մեղ կտաք, իսկ մնացած մեծ մասը դուք լիուլի կը վայելէք, իբրեւ ձեր քրտնիքի արդար վաստակ»: Հարկաւ, խորամանկ բէկերն իրենց չար նպատակին հասնելու համար ոչ մի հնար և միջոց չէին խնայել: Ժողովրդական առածն ասում է՝ «կաշառքը մութ տեղը լոյս կտայ». ազդեցիկ և հարուստ բէկերի փայլուն ոսկիները մեծ հրաշքներ գործեցին: Սրանից մի քանի տարի առաջ պետական պաշտօնեաների հսկողութեամբ հողաբաժինները երբոր չափչփում և յատկացնում էին գիւղական համայնքների իւրաքանչիւր ընտանիքին, այն ժամանակ Զոռլու և Միրզարէկլու գիւղացիներից մի քանի տասնեակ ծխեր բոլորովին զրկուեցին իրենց բարերեր վարելահողերից. վասնզի կարճամիտ և վատահոգի Հայերից և թուրքերից ոմանք ցոյց էին տուել, որ այդ պետական հողաբաժինները զուտ բէկական հողեր են: Ահա այսպիսի խորամանկ միջոցներով, իսկ երբեմն էլ սարսափելի սպառնալիքներով, վերջին 30—40 տարուայ ընթացքում բէկերը հետզհետէ յափշտակեցին պետական ընդարձակ և բերրի հողերը և կատարելապէս տէր դարձան: Այդ արգաւանդ հողաբաժինների առատ բերքերից առիւծի բաժինը իրենք բէկերն են ստանում, իսկ աշխատասէր և չարքաշ երկրագործ Հայ գիւղացին մնում է սոված, մերկ և խեղճ վիճակի մէջ: Մի բուռն իսկական երկրագործ ժողովրդի դարաւոր